

Bunita historia di:

Wilfrido Ortega autor cu libreria na pia

Diahuebs anochi den Biblioteca Nacional y Diabierna anochi na Universidad di Aruba, e autor di Corsow, Wilfredo Ortega ta participa den e anochinan riba literatura. Diabierna anochi e lo tene un charla y diahuebs anochi e lo lesa un fragmento di un di su obranan. Si mester lesa e biografia di e autor aki, lo por bisa despues manera mi a titula e articulo aki: E autor cu libreria na pia". For di su biografia extenso cu mi a ricibi, mi lo saca algun fragmento pa conoce e autornan. Corda bon esaki no ta skirbi pa mi, ta fia mi ta fia e palabranan aki for di e biografia ricibi y cu ta hopi bunita. Ta di Sra. Glenda Reiziger di Departamento di Cultura mi a ricibi esaki y a dicidi di publike pa tur hende conoce e autor respetable aki. Sino nan lo acusami di plagio mañan, usando obra di otro hende cu mi nomber bao di dje.

75 Aña di edad y 50 aña publicador

Riba 26 di oktober 2007 el a cumpli 75 aña di edad. Riba e mesun dia aki Ortega a cumpli 50 aña cu el a cuminsa publica novela. Ortega ta skirbi novela na Papiamentu, imprimi e buki su mes na cas y cana bende nan cas pa cas den bario di Corsow.

Ortega banda di ta activo riba tereno di literatura, e ta musico tambe. E ta un discipulo di Marcel Hooyer. Ora Marcel Hooyer ta duna mucha les di musica, e ta compone. Ortega ta habri siman cu misa pa resa na Dios Tata, Dios Yiu y Dios Spiritu Santo pa yama danki y pidi yudansa pa por realisa su metanan. Ortega ta sinti cu esey ta e unico manera pa su siman habri bon.

Ken ta Wilfrido Ortega?

Wilfrido Ortega a nace na Corsow dia 26 di oktober 1932. E ta biba na Weg naar Welgelegen 13, cas di su mayornan. Señor Ortega ta soltero y tin 13 aña bibando den e cas na Weg naar Welgelegen 13. Wilfrido Ortega a bishita scol di Wishi cerca Frater Bernadinus. Cu 13 aña di edad el a caba e scol aki. Su mayornan a mand'e bedrijschool di Isla, pa e haya trabou y yuda

financieramente na cas. Aki el a siña durante 2 aña, pa despues cuminsa traha como laborant den laboratorio. E tempo ey e tabatin 15 aña. El a traha 9 aña na Isla. Na aña 1957 el a kita. Ortega ta domina Hulandes, Spaño y Ingles.

Na un edad avansa Wilfrido a sigui curso di computer pa principiante y ortografia di Papiamentu.

Historia di skirbimento Con el a cuminsa?

For di 7 aña di edad señor Ortega a cuminsa conta cuenta. E tabata compaña su mama bay belorio. E tabata sinta inventa cuenta y conta esaki na esnan sinta pafo di cas. Semper su cuentanan tabata cay masha na smak y un persona a dun'e e idea pa pone su cuentanan riba papel y warda nan. Despues di esaki Wilfrido a cuminsa pone su cuentanan riba papel. Na aña 1957 ora Wilfrido a kita for di Isla el a cuminsa publica e novelanan cu e tabata tin warda. Despues el a cuminsa skirbi novela nobo pa bende. Señor Otto Zalm biba den Otrobanda a imprimi su prome buki. Wilfrido ta conta cu e tempo ey tabata tin hopi interes den pueblo pa buki na Papiamentu. El a splica cu ta Guillermo Rosario y Tujuchi tabata esnan cu tabata skirbi na Papiamentu. E prome novela cu Wilfrido a publica tabata titula "Destino di Amor" y tabata consisti originalmente di 500 pagina. Señor Zalm a conseha pa haci e novela mas cortico pa baha gasto di imprenta.

Wilfrido a adapta e novela y reduci e paginan te na 60. Prijs di e buki a bira fl. 1.25 pa ehemplar.

Imprenta y Distribucion

Pa motibo cu a dura dos aña prome cu a imprimi e prome novela Wilfrido a dicidi cu e mes ta saca su bukinan y cana bende. El a cumpra mashin di type, mashin pa multiplica y otro material necesario p'e mes por imprimi y mara su bukinan. Cu su di dos novela ya Wilfrido a yega na un grupo di 3000 cliente. Cu transporte publico e tabata baha den e barionan di Banda Bou y Banda Riba y cana bende buki cas pa cas. E tabata bende 1200 buki pa

luna. E luna siguiente e tabata cana cobra. Mientras e ta cobra e tabata entrega buki nobo. Meta mas principal di Ortega tabata pa yega na un compania di benta di su propio bukinan. Meta cu nunca no a cristalisa pa motibo cu tur su ganashi tabata bay na pago di e personanan cu tabata yud'e cu benta, tempo cu el a cuminsa. Esaki tambe tabata un di e motibonan pakico el a tuma e decision pa e mes cana bende su bukinan. Wilfrido a trece dilanti cu financieramente semper su bukinan a sostene. Nunca e tabata tin mester di fia ni un florin cerca niun hende. Wilfrido a yega di entrega buki na libreria pa bende. Pero libreria tabata bende solamente 6 buki pa luna. Segun Wilfrido esaki ta debi na e hecho cu e hendenan tabata para den libreria mes lesa e bukinan. E bukinan no tabata tin hopi pagina loke ta pone cu den dos tres dia por a lesa y caba nan den libreria mes. Esaki ta e motibo pakico Wilfrido a stop di entrega buki na libreria.

Inspiracion

Wilfrido a splica cu e ta haya su inspiracionnan for di situacion di bida. E por drenta bus, mira un situacion cu despues ta bira un novela. Segun cu e tabata cana bende cas pa cas, su clientenan tabata cont'e cierto historia. Esakinan tambe tabata sirbi como inspiracion pa su novelanan. Wilfrido a conta cu su satisfaccion di mas grandi ta ora cu e yuda su clientenan cu solucion pa cierto problema mediante su novelanan. El a trece dilanti cu ora e bay entrega buki, un cliente ta cont'e di un problema. E siguiente luna e ta presenta un novela nobo caminda e ta trata e problema ey, compaña cu un solucion. Segun Wilfrido esey ta e motibo pakico su clientenan ta gusta cumpra su novelanan.

Estadia na Aruba y Boneiru

Wilfrido Ortega a biba 7 aña na Aruba y 3 aña na Boneiro. El a haci esaki cu e intencion pa expand'e su clientela. Durante e añanan aki Wilfrido a skirbi buki y un obra teatral na Boneiro. Señor Boy Antoin a actua den e obra aki na Boneiro. E tempo ey e

tabata tin 17 aña di edad. Na Aruba tambe Wilfrido a skirbi buki y un obra teatral. Na Aruba Wilfrido tabata tin

un persona cu tabata atende su asuntonan di buki. E tabata tin tambe diferente mucha ta bende buki p'e. E muchanan tabata cobra fl. 0,25 pa cada buki cu nan bende. Den e temporada cu Wilfrido a biba for di Corsow, e no a bende Corsow, e no a bende buki na Corsow.

Bek na Corsow

Despues cu Wilfrido a regresa Corsow el a cuminsa bende buki atrobe. Despues di su ausencia di 10 aña el a bin constata cu hopi di su clientenan di prome ora a muda. Tabata tin otronan cu el a perde contacto cu ne. El a bin keda cu un cantidad di 1200 cliente cu tur luna tabata cumpra buki cerca dje. Sr. Ortega no a skirbi ningun obra teatral aki na Corsow.

Na aña 1993 a presenta un novela di Ortega na Radio Hoyer. Titulo di e novela tabata "E convenio di amor" cu Gilbert Sparren como protagonista. Gibi Doran a compone e promo musical di e novela. Wilfrido a trece dilanti cu na ningun di e tres islanan, no tin cliente cu tin su coleccion di buki completo.

Credito

Sr. Ortega a trece dilanti cu den pasado algun artista y autor manera e.o. Eddy Pieters Heyliger, Eligio Melfory Harry Zimmerman a acerc'e. El a sigui bisa cu Eddy Pieters Heyliger ta su bon amigo y cu Harry Zimmerman a graba 3 piesa di dje

Wilfrido Ortega a sigui trece dilanti tambe cu hopi hende kier su material, pero no ke dun'e credito como autor.

Situacion actual

Awendia Wilfrido ta cana bende buki keto bay. Nunca e no a bende buki den su propio bario. Wilfrido ta sinti bon di salud. El a trece dilanti cu nunca e no a bira malo, bay dokter ni hospital. E sa bay dokter pa chekeo so. Nunca e no a uza bril tampoco. Wilfrido a trece dilanti cu un persona a regal'e un bril cu e ta uza ora e ta traha na computer pa protega su wowonan.

Ambicion pa futuro

Ambicion di Wilfrido ta pa un dia stop di cana bende buki. E kier sigui skirbi pero ta desea un lugar confiabel caminda ta bende su bukinan. Semper el a biba financieramente independiente cu entrada di su bukinan y su pension di biehez.

Homenahe

Dia 26 di oktober 2007 Kas di Kultura Korsow a rindi homenahe na Wilfrido Ortega, tirando luz riba balor literario y balor cultural di su obranan. Durante e homenahe aki Wilfrido a ricibi un placa di reconocimiento for di man di Diputado di Cultura Sra. Alcala-Walle

A expone tambe algun ekipo y artefacto cu Ortega a uza cincuenta aña pasa tempo cu el a cuminsa cu imprenta. Wilfrido Ortega ta ehempel di emancipacion, di consistencia y perseverancia. Nos por siña hopi for di dje.

Juby Naar